

# *Bien moustrez, Printemps gracieux*

*De quel mestier savez servir,*

*Car Yver fait cueurs ennuieux,*

*Et vous les faictes resjouir.*

*Si tost comme il vous voit venir,*

*Lui et sa meschant retenue*

*Sont contrains et prestz de fuir*

*A vostre joyeuse venue.*

*Yver fait champs et arbres vieux,*

*Leurs barbes de neige blanchir,*


*Et est si froit, ort (1) et pluieux*

*Qu'emprés le feu couvient croupir ;*

*On ne peut hors des huis yssir (2)*

*Comme un oisel qui est en mue.*

*Mais vous faittes tout rajeunir*



*A vostre joyeuse venue.*

*Yver fait le soleil es cieulx*

*Du mantel des nues couvrir ;*

*Or maintenant, loué soit Dieux,*

*Vous estes venu esclersir*

*Toutes choses et embellir.*

*Yver a sa peine perdue,*

*Car l'an nouvel l'a fait bannir*

*A vostre joyeuse venue.*

*1. Ort : Sale. 2. Yssir : Sortir de sa maison.*

*Charles d'Orléans (1394-1465)*

